


T5427 / 7922

4

CHINESE JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

OCT 20 1960











眉公先生晚香堂小品卷之六

雲間陳繼儒著

詩

哈佛大學漢和  
圖書館珍藏印

七言絕

山居

西崦茶塢有人家。雲抱青山水抱沙。記得春深無箇事。梅花看盡又桃花。

鼓琴

老樹槎牙匝澗生。彈琴樹底月淒清。有時絃到真悲



處古戰場中。蟋蟀聲。

村居

青草湖邊白石西。花籬茆屋酒帘低。來來去去雙黃鳥。不到濃陰不肯啼。

余嘗過一山隣。老而嗜花紅紫暎戶。弄孫負日。使人不復知有城居車馬之鬧。况京師滾滾塵耶。贈以詩。

有箇小扉松下開。堂前蔬藥繞畦栽。老翁抱孫不抱甕。剛欲灌花山雨來。

山行

羣峰盤盡吐平沙。脩竹橋邊見酒家。醉後日斜扶上馬。霜楓一路似桃花。

西湖

空山無雨欲生烟。綠樹黃鸝幾箇船。三尺孤籐尋着汝。不教獨坐水聲邊。

讀神僧傳二首

寂寂空山報晚鐘。繞身三匝見獰龍。戲將絛繫龍鱗上。明日尋來是老松。



其二

百尺龍湫徹底清。風吹一葉毒龍驚。老僧浴罷腥風起。霹靂光中嘯幾聲。

梵園

梓樹新移綠蔭門。此中獨坐了無言。藤花堆裏鐘聲出。却合山僧號梵園。

椿林夢崔

三教逸史八詠

羽扇綸巾坐嘯臺。邊塵不動塞雲開。碧霄欲展凌風翅。墮地原乘雀下來。

榆谷餐霞

餐霞夢到赤城邊。綵筆花生字字妍。人世不禁天際想。英雄退步卽神仙。

鈴閣談兵

威名能止小兒啼。更出鞞鈴共指迷。塵尾風生雄辨發。數聲清柝五更雞。

衡闈講學

少小能彎五石弓。年來絃誦更雍雍。自從洙泗傳心後。爐雪功名一點紅。



芝廬問道

間關百戰命如絲。誰覺黃梁夢熟時。留得樓蘭三尺  
劍。華山絕頂掘靈芝。

蓮界叅禪

茫茫萬事總成空。稽首曾叅亡是公。欲辨戰場真勝  
負。春風百草鬪兒童。

五岳壯游

將軍三十已登壇。草木知名盡膽寒。幾度凱歸思卸  
甲。名山深處學龍蟠。

三教會極

青天無滓月無塵。勲業空花學道真。誰識圖成麟閣  
像。本來三教一閑人。

山園泉石

五色離離石子班。誰開新溜放春泉。泉聲如此聽不  
盡。多買桃花種兩邊。

同郁季雅過庵山

窗中榆柳映繩牀。野色蕭疎納晚涼。却笑城邊僧寺  
裏。叩門游客送迎忙。



題開一上人壁

樹色周遮護水西。竹扉花落小橋低。庭中不獨馴飛鳥。雞爲聽經不敢啼。

初夏欲往小崑山題包彥平扇頭紀事

當年曾築乞花場。花事闌珊二陸堂。今日棹歌山畔去。新蘆高柳半斜陽。

米子華。金華居士也。彥平來雲間。諸社中皆集鴛

鴛湖頭送之。渭城之句。子華獨闕。留以待之。余爲拈此。米南宮痴絕。東坡謂吾從衆。余亦類是耶。

湖頭舞棹入蒹葭。空望鴛鴦拍浪花。臨別不曾留半偈。數行空待米金華。

題野寺

城隅澌水帶斜暉。如雪楊花點客衣。犬吠隔村烟暖暖。僧棲獨榻對霏微。

感世

兩丸日月推名利。一片乾坤夾是非。試聽中峰道人偈。不如篋笠上漁磯。



雪中

買酒村中上馬遲。梅花歷亂開南枝。誰知風雪冷如此。正是英雄射虎時。

題僧畫

山南山北弄新晴。日出湖頭水氣明。記得斷橋臨別處。數行秋樹共師兄。

題畫

別一山川眼更明。幽居端得稱幽情。由來老筆荆關輩。施粉施朱笑後生。

得純陽焚香掃石之句偶作

掃石焚香過此生。隱居亦自有勛名。猶嫌剝啄驚門雀。何日峰頭坐月明。

新秋雨中贈士倩女俠畫扇

翩翩俠骨較書才。才寫殘山未點苔。獨坐小窗停筆想。畫中添却載花來。

戲題伯大渡水

雲山不斷蟬聲送。潮聲半壓蘋花重。漁郎忽入水晶宮。誰將鐵笛來三弄。



題隱士

結茆半在古松層。松下清池好濯纓。此際斜陽淡如  
許。更求添畫鬪茶僧。

舟中

出門沙鳥及江魚。臥看雲山坐讀書。却笑柴桑翻計  
拙。門生二子荷籃輿。

供花

水晶甕子折花栽。欲倩東風未敢猜。昨夜一番春夢  
好。果然養得海棠開。

贈武士

紫閣花飛散吏牙。肘懸金印淨胡沙。山中亦有閒勳  
業。榻得蘭亭上白麻。

早秋曉櫂

蕭蕭洒洒數點雨。磊磊落落千章松。早起路旁無過  
客。隔谿明月打山鐘。

春日

一夜東風半柳枝。家家小雨綠絲絲。如何漫興爲圖  
畫。又乞先生一首詩。



春游過貞女墓有感

濯濯新楊破水痕。纍纍孤塚有貞魂。烏啼深竹藤花落。落日輕烟罩墓門。

春閑曉起

一簾晴色養花風。鸚鵡馴人不閉籠。曉起恰當殘月白。提壺親自洗梧桐。

湘妃竹

翠筠點點滴珊瑚。帝子春魂若可呼。夜半洞庭風雨過。不將清淚滴蒼梧。

吳王試劍石

空山片石護蒼苔。醉倚秋風一劍開。荆棘蕭蕭零露白。夜深麋鹿下荒臺。

高帝斬蛇劍

王氣千年屬至尊。劍梢星古赤黃昏。陰陰大澤黃雲起。空望咸陽哭帝閭。

賈佩蘭出爲段儒妻

天上人間不可期。扶風月色淡蛾眉。御溝一片楊花水。曾入深宮百子池。



探丸

夜行曾不問金吾。走馬探丸意氣麤。斫吏歸來明月落。劍光寒澗血模糊。

送僧徧通游天台

夢游同汝坐莓苔。飛瀑懸崖萬丈來。夢裏瀑聲還撼夢。不如真箇到天台。

納涼二首

高柳陰森蟬咽時。橋西浴馬散駢絲。有人閑到山門過。欹立風前讀舊碑。

其二

簷燕衝簾帶子飛。青蟲風颺墮人衣。日長散髮湖邊坐。松結涼棚傍釣磯。

新秋

田田蓮葉起涼風。支枕高吟草閣中。何處歌聲振林薄。采菱船在蓼花東。

荷池涼夜

竹外田田蓮葉風。朱欄艸閣小橋東。不知若個能圖畫。畫入盈盈團扇中。



檢史 有序

萬曆甲午。司農郎葉公春及疏云。孔子刪書。斷自唐虞。迄周。典謨訓誥誓命之文。凡百篇。秦火後。行于世者五十八篇耳。秦始皇二十六年。遣徐福發童女數千人。入海求神仙。徐福多載珍寶圖史。至海島。得平原大澤。止王不歸。今倭其種也。始皇三十四年。始下焚書之詔。故司馬光溫公倭刀歌曰。徐福行時書未焚。遺書百篇今尚存。乞乘小西飛封欵之便。及纂修正史之時。檄至彼國。搜尋三代以前古書。葉公此疏。實非迂濶。丹鉛總錄。雙槐歲抄。亦嘗言及之矣。春日課兒山房。偶談前事。戲題。

雪滿前山酒滿觚。一編常對老潛夫。兒曹空恨咸陽火。焚後殘書讀盡無。

新豐行

新豐高貲十萬戶。沽酒蹴鞠消殘春。莫嗔子弟多無賴。此是上皇諸古人。

夏熱思深秋之樂



秋風吹得萼絲滑。夜雨新炊秬飯香。正喜故人茆屋下。橙羹鱸膾話斜陽。

同秋潭看花

暮春猶是怯春寒。病骨支離看牡丹。小幙無風僧話久。一齊花與共平安。

天池

春當三月鳥聲忙。柳浪參差麥浪涼。此日吳閫好風景。僧厨十里焙茶香。

西湖

閒往閒來獨和歌。柳花燕子水微波。西湖堤上平如掌。春艸青青放白騾。

洛陽

春夢時時到洛陽。牡丹開處酒亭香。尋常送客花千柄。蠟蒂筠筐接道傍。

廬山

古壁寒泉積蘚長。春潭雲木幾千章。何年乘犢入山去。醉石前頭結草堂。

乞牡丹



朱欄碧幄護輕紅。燕尾游絲蝶翅風。更與名花駐顏  
色。小鬟偷插膽餅中。

同南華載菊候士倩代題

斷橋茆屋點秋沙。楓葉林端是妾家。曾記重陽新雨  
後。扁舟有客送黃花。

題觀濠堂三首

楊柳垂枝掃落花。花飛起處是誰家。曲城新築觀濠  
室。十里桑麻五色瓜。

其二

城頭人向樹頭行。半聽歌聲半鳥聲。此日觀濠堂上  
客。何星不是白長庚。

其三

粉榭朱廊遶曲城。花枝竹篠水痕平。此中幸有吾師  
在。日日雙柑醉聽鶯。

池上二首

一溪樹色一簾烟。茗椀薰鑪秋水篇。正合香山居士  
句。芙蓉開在臥床前。

其二



曉起科頭坐竹邊。無聊拄頰更高眠。何來瑟瑟松風  
度。却是花闌沸茗泉。

題壽山福海圖二首

酒甕嘈嘈杞菊香。解衣松下月清涼。年來數畝山田  
熟。半作花錢半糶糧。

其二

蕭蕭綠髮映朱顏。買雀修琴不記年。門外客來無酒  
器。缺冠長汲杏花泉。

春暮山居

萬壑松濤撲澗花。繡幢垂影打新鴉。猶嫌山淺通游  
屐。小闢峰頭別種茶。

贈山中人

松邊老雀雪爲翎。三足磁鑪數卷經。彈罷絲桐過山  
去。風吹芝艸滿籃青。

送郁大碧歸樵李

楓葉黃時滿屐霜。歸家新秫酒花香。何當撥却蘆花  
棹。烟雨樓前話夕陽。

送人還山



一片空青遞遠鐘。鐘聲出處冷雲封。採得黃花送歸棹。臨行又贈白芙蓉。

贈醫士

山中親啓石函經。到處逢人號客星。才下刀圭枯骨起。醉騎雙鳥羽毛青。

游仙詩

閒將虎子浴前溪。有女如花坐奕棋。贏得一雙紅玉板。逢人便唱踏歌詞。

少年行

紫衣綠幘的嬌嬌。騎馬吹簫渡野橋。若使石郎應見此。宮花肯賜鄭櫻桃。

限韻

簷鳥初喧午夢長。荷花開盡白蘋香。鈎簾撥出爐頭火。摹得黃庭一兩行。

詠柳

紛紛白花初下柳。柳色青青膩如酒。樓頭人望陌頭人。春愁忽忽君知否。

詠桃



明香堂 卷之六  
游人隊隊摘含桃。烏食桃殘半帶毛。擲却桃兒上船去。柳洲亭外刺雙篙。

詠石

不獨橋邊有黃石。西湖之西今復赤。骨青帶雨更帶苔。半匝松花與桃核。

詠松

曾笑西湖九里松。樛枝數尺不成龍。只因枯頂時多月。照見南高峰外峰。

詠寺

我曾醉上西湖寺。紅葉梢邊影三四。三三四四白雲來。時爲雲多見其二。

詠舟

西湖一百捉魚舟。半賣游人半酒樓。惟有漁郎只如此。許多紅粉付東流。

詠馬

醉來峰頭橫鞭馬。松梢綠生松外瓦。馬倦爲我繫松根。臥而看山聊且且。

詠泉



長嘯無心惟咄咄。手摘松花及三撮。掃來枯葉煮新  
泉。半是蠶聲半魚沫。

詠妓

琵琶不彈愛彈蒯。顰如芙蓉字如薤。女師元是聶隱  
娘。劍術不向人間賣。

詠僧

生嗔詩債欲爲僧。一頂蒲龕半壁燈。却怪支郎太多  
事。醉牽白馬月中乘。

題雪逢

一領蓑衣一席風。滿天雪色稱詩翁。釣竿時向烟波  
宿。海底珊瑚夜夜紅。

書扇

楊柳陰中洗馬時。涼蟬響在最高枝。醉來獨擁月明  
臥。不與紅綃鬪賦詩。

題季仲舉扇二首

一畝新塘半折開。石頭溪出水滌洄。門外酒船何處  
發。楊花桃葉渡頭來。

其二



數株楊柳數株桃。籬落稀疎薄暮潮。中有幽人住溪閣。讀書初罷學吹簫。

一送黃孟威之金陵

太史唐元徵甥

紅板月明桃葉冷。白門霜薄柳枝黃。從來甥也多如舅。此去何人敢雁行。

長夏訪鄉居友人

槐穢疎疎急暮蟬。看人洗馬月初圓。博山沉水香烟靜。楊柳灘邊刺小船。

題畫

老去支筇已不勝。興來猶上最高層。長松落落微陰裏。只少斜陽掃葉僧。

壽朱錦林母七十

五色雲綃白髮新。前身元是魏夫人。一從崔到西池後。猶有青蓮花在中。

周公美得婉兒稱心戲作二首

明河如水夜何其。晏坐非關中酒時。女伴不知人冷熱。鬢邊抵死插花枝。

其二



芙蓉紫褶稱身裁。籠袖含嬌倚鏡臺。數日秋陰笙板  
澁。郎如顧曲莫先來。

看芙蓉

太湖月出秋冥冥。辦得漁裝上釣舲。兩岸芙蓉一聲  
笛。侍兒新賜號樵青。

秋日贈妓

拂紅束素日初斜。笑語居然是內家。欲取秋光輕貼  
髻。小鬟相得瘦黃花。

避暑

萬壑松濤碧欲流。石牀冰簟冷于秋。卷簾飛瀑三千  
丈。恰對我家竹裏樓。

郁伯承留吳少君過年戲代一首

短髮禁風不出戶。擁爐聽雪西城隈。好待杏花春鴨  
外。一篙直度到門來。

春日訪殷方叔

櫻桃花開春可憐。何處游人不放船。却羨白頭殷處  
士。鷓鴣聲外獨耕田。

戊戌四月四日。積雨初豁。峰泖清妍。簫鼓振林。送



明齋堂  
卷之六  
春船至。乃太史唐元徵也。訪余讀書臺。一宿而別。得絕十首。

登閣望泐

斜陽約略水西頭。餘景還能上竹樓。天際蘼蕪半窗綠。釣簑歸處起雙鷗。

看白駒泉

僧厨杉影野茶香。曲徑逶迤到草堂。笑倚山根覘泉脉。薔薇紅白道衣黃。

聽僧夜話

殘鐘忽報竹林東。古殿烟寒佛火紅。晚課罷時僧影散。院門雀叫落花風。

酌婉孌堂中

攜壺遙度嶺頭來。驚起棲鳥下石臺。春雨燈花寒自語。夜深偏傍故人開。

宿園室

甕牖分明屬臥游。一齊峰泐鏡中收。曉來霽色排天眼。千里雲濤見釣舟。

初聞黃鳥



兩餘石壁綠初齊。細拂苔痕認舊題。讀罷支頤碧窗下。松花如雪打黃鸝。

僧乞書

素練烏絲百尺長。含毫飽濺墨花香。偷閒欲與山僧話。却笑差科半日忙。

饌香積

抱花尋壘燕飛飛。椿樹抽芽蕨葉肥。一餉平分僧鉢飯。歸舟已候綠楊磯。

臨行以舟中瓶花爲別轉游柰山

欲別殷勤贈牡丹。膽瓶春色未全闌。不知嘯入東山去。刻竹題詩遍幾竿。

元徵有入林之約戲嘲訂之

碧山學士少山居。若比愚公尚不如。何日巖扉喜隣竝。五千佛藏萬籤書。

送友應試南都

五花龍馬齒新齊。何處行空汗血蹄。八月桂叢秋正好。聯鑣十里孝陵西。

吳德言念松石翁不忘。乞介公寫圖。索題以詩。



風吼松濤萬壑哀。寒泉迸石繞泉臺。老僧墨澣孤兒血。攝取先生曳杖來。

和令則題畫七首

山中雨後綠交加。浙浙棕鞋樹底沙。坐歇草庵僧不見。白鷗如雪挂藤花。

其二

綠到春山不可加。卓庵峰處盡丹砂。湯泉難化千年雪。雪裏常開五色花。

其三

山村雨霽水痕加。鴨嘴灘頭燕尾沙。新結松棚新試茗。好風無力掃藤花。

其四

十載開山老漸加。偶然鴻爪印泥沙。曉來梳髮池亭上。不卷疎簾對藕花。

其五

鏡中不怕鬢霜加。且與兒童學聚沙。三疊黃茆千箇竹。四邊青嶂一池花。

其六



睡起難禁酒力加。醉時隨臥白鷗沙。草堂位置新籬  
落。蕉葉西邊橘試花。

其七

攀上孤峰力更加。村墟簇簇水中沙。農師老稚無憂  
色。社鼓聲聲鬢髮插花。

采蓮曲

雙雙齊唱采蓮歌。十里荷香暗綠蘿。不怕溪頭秋水  
濶。由來少小慣風波。

若耶溪

苧蘿山下住西施。昔在吳宮今在誰。流水無聲村徑  
隔。小桃新柳坐黃鸝。

北風吹裙帶

一鈎斜影上茶蘼。羅帶飄風不自持。背却小姑私拜  
月。水晶簾外又來窺。

宮蠶

女桑新綠映宮槐。三月春風戴勝來。織就鴛鴦錦千  
疋。金刀先取合歡裁。

燕姬墜馬



十五妖姬髻似鴉。金鈿彈面玉釵斜。驂騑忽墜珊瑚  
鐙。燕子低飛掠杏花。

春閨怨

寶鏡春花嬾畫眉。紗窗明月鬪彈碁。閒來偶向池邊  
去。楊柳青青又幾枝。

載菊

取次山人酒一瓢。趁潮歸去路非遙。當船明月織如  
許。載得黃花不碍橋。

贈雪浪師

曲水迴舟度九峰。坐來窗外落疎松。何緣二陸干將  
地。無限藤花蔓草封。

題山僧黃雀山樵卷後

帶粉新篁半度墻。入門松影落匡床。畫中詩句詩中  
畫。付與山僧半日忙。

山中

薙草澆花老比丘。焚香時坐最高樓。年來踪跡厭城  
市。不向隣家借釣舟。

藏鈎



隔牆垂柳似章臺。花濕胭脂帶雨開。若箇巧藏鈎在手。盈盈含笑誤人猜。

蹴鞠

繡陌花明艸色繁。綵毬飛處萬人看。不禁香汗羅衣濕。其奈輕腰錦帶寬。

鞦韆

粉蝶朱闌挂綠楊。春風飄蕩綵絲長。只緣睡起嬌無力。落地花泥滿綉裳。

春日獨當壚

石榴裙帶漾春風。酒幕高張綠樹中。晚下金貂須醉飲。阿郎騎馬獵新豐。

七寶避風臺

太液春風絕可憐。朝來吹綠一池烟。雲屏錦帳當空起。千尺金臺九品蓮。

薛夜來

紅粉三千獨擅名。暗縫龍袞自分明。六宮減却驪珠價。神女新來不夜城。

清夜游西園



蘭葉疎疎白露溥。珠簾銀燭夜光寒。西園公子風流甚。千古才名屬建安。

愛妾換馬

紅顏黯淡破新裳。紫燕翻飛服上襄。總愛桃花文五色。寧憐柳葉淚千行。

題泖塔

泖上空波疊亂沙。寺門橋斷半蒹葭。何從一借風帆力。醉挾飛鷗拍浪花。

山中寺

一天秋色淡松花。獨雀歸來帶落霞。石洞草深僧入定。白雲飛出護袈裟。

題畫

秋氣叢叢撲暗沙。紅樓燭冷聽琵琶。曉來憑几看秋色。隔浦芙蓉未着花。

初夏卽事

梅雨晴時處處蛙。尋常家釀不須賒。老親醉後盤飧散。瓶裏初開夜合花。

題徐孝廉瞻親圖



當年堂上舞衣鮮。此日瞻雲思惘然。底事蛛絲網書  
篋。涕餘愁見蓼莪篇。

春郊卽事二首

十里松陰水上浮。晴沙細草臥江鷗。過橋欲看春山  
色。一片寒雲落杖頭。

其二

桃花春水鱖魚香。帆影飛來挂綠楊。一帶平沙似圖  
畫。醉聽黃鳥濯滄浪。

贈陳鏡仙風鑑

兩鬢蒼蒼毳布青。山中親啓石函經。相逢笑我烟霞  
骨。知爾前身是歲星。

題壽安寺壁

灌木陰陰殿角斜。寺門一帶好人家。春潮退後溪風  
急。破網無魚挂落花。

題漁者圖

挈罌坐釣秋江湍。沽酒容易求魚難。世間好物不在  
速。三尺鱸魚晚上竿。

秋隱



芙蓉如樹不開門。水氣泠泠花氣渾。長日山扉無一事。蕉陰滿地鬪鷓鴣。

送友人游南都

長干明月酒如泉。叢桂紛紛撲畫船。匹馬踏開紅板月。綵毫題帶白門烟。

過孫世聲園居

出郭行游日未斜。尋常笋蕨稱山家。枯藤半挂疎籬畔。一道香生鶯粟花。

晚泊

近來學得倪迂法。藏酒緘茶更惜香。不是留些窮活計。若爲消得這斜陽。

園居

涼蟬晚咽芰荷風。茶熟香清草閣空。忽憶閩中新雨後。峰頭金碧荔枝紅。

花生日戲作三首

百花生日雨初晴。年尾年頭果價平。恐是有花郎不識。戲將紅線記花名。

其二



的的櫻桃當井開。笑郎終日不曾回。入門便有好花  
插。花少郎多次第來。

其三

一陣春風萱草西。團團如雪滾春泥。若非生帶桃花  
煞。何故終朝不住啼。

對雀

獨眠石室竹千竿。看爾仙姿振羽翰。別後山僧寄書  
至。開函先問雀平安。

得雀

開籠有雀印蒼苔。雀到真如道士來。我已機心渾忘  
却。自鳴自舞莫相猜。

再題烟雨樓

秋老蘋花帖岼開。雪鷗一點夜飛來。逢人盡道游烟  
雨。月白何曾獨上臺。

丙申閏月築小崑臺

忍飢買得山陰地。赤足來疏雨後泉。何日歸歟蓮社  
裏。故鄉重結白頭緣。

題王楚玉蘭



年來空谷半霜風。留得遺香散草叢。只恐樵人混蘭艾。紅顏收在束薪中。

山中自敘

榻得平原爭坐帖。放開兜率照顏花。此時穀雨新晴後。櫻笋初甘又試茶。

游資慶寺

我來入寺非生客。曾與名山夢裏游。一笑相逢借盧橘。滿筐分破洞庭秋。

登縹緲峰

十頃湖光四面開。松陰上下點如苔。莫言縹緲君曾渡。先有樵人雲外來。

贈洞庭種桃道士

椰瓢葵扇竹筐斜。每對松風一點茶。却笑閒人有清病。白頭辛苦種桃花。

贈醫

採得神芝已滿囊。一簾春雨喜初黃。門前底事多車轍。人說君家降藥王。

送戴望之富陽讀書



聊齋堂 卷之六  
松風十里冷于秋。江水潺潺及馬頭。君去若尋消夏處。釣灘六月好披裘。

題恰受船

菱葉疎疎不碍舟。綠蓑時挂釣竿頭。此中無物堪容汝。剛許沙鷗一點秋。

燕未來

百花深處艸堂開。風雨愁人燕未來。無數落花思燕子。莫教容易掃蒼苔。

題仙館圖

有序

玄宰爲季重王使君作仙館圖。極得董巨筆意。半以吳興運之。今使君出宰青溪。暫作峰泖客。卿有玄宰烟雲供養。勝於玉宸香案吏多矣。佛經有人非人等。故題一絕于上。

北窗一榻我愛我。南華半卷人非人。仙曹官吏如蟻。蟲傲骨難甘作弄臣。

題雲山

谿山鶻突雲憎董。大年直接襄陽統。古格寥寥誰賞音。琴上無絃笛無孔。



題松

入林松影綠茫茫。叢艸多聞琥珀香。崔子解飛乘月去。空巢生出野鴛鴦。

題畫

翠壁丹崖赤板橋。隔林黃葉更蕭蕭。何當踏月橋邊去。千尺飛泉酒一瓢。

贈堪輿

緊絆芒鞋未肯休。月明長嘯萬山秋。異人傳得搜龍訣。到處能教石點頭。

讀項羽傳聞畫眉

疎星淡月曉風輕。熟睡山樓夢亦清。讀到虞兮離別處。英雄那得畫眉聲。

和葛實父

風風雨雨無人至。有客繫舟來看花。君號懶髯真箇懶。酒瓢不挂別人家。

山中

空山無伴木無枝。鳥雀啾啾虎豹饑。獨荷長鑱衣短後。五更風雪葬要離。



壽沈節母

五更機杼讀書檠。膝抱雙孤課一經。兒已成名婚嫁畢。女中原自有程嬰。

結夏翠峰寺

古院濃陰夏亦寒。追涼更喜石臺寬。蕭蕭記得東軒竹。綠玉無塵粉未乾。

妓席不赴詩以謝之

桐花如雪散空階。香氣網縕百和諧。不及綠毛么鳳鳥。飛來先挂美人釵。

洞庭白馬廟楊梅萬株麝香百合不計數。同蓮儒平叔諸君探之。

筍輿直上白馬廟。更下太湖浮酒杯。百合滿山香麝發。人人登樹採楊梅。

夜宿沈謙之庄口二首

太湖風送波如烟。收入荷香淺港邊。小閣曲橋臨橘柚。日斜恰到捕魚船。

其二

買得湖魚鮮更肥。坐無遷次酒交飛。雪花梨白葡萄



紫明月紅樓在翠微。

睡起

妖姬十五髮初齊。倦倚花欄日欲西。幾度小鬟扶不起。畫眉人怕畫眉啼。

吊達觀禪師

當年曾住碧山頭。未必公卿盡海鷗。莫怨網羅彌世外。鳳麟只合赤霄游。

胥口伍相國廟

廟門老樹何年栽。赤日生火陰風哀。神騎白馬湖中來。鴟夷子皮浪打開。

太湖石

嵌空巖竇綠氤氳。半是霜灘舊水紋。昨夜何人弄湖月。笛聲吹裂洞庭雲。

九月送古水游天池諸山得六首

斯人不可使常閒。繫絆芒鞋踏遍山。月落雞鳴未歸去。歌聲猶在水西灣。

其二

偏袒松根懶下山。斯人不可使常閒。夜來搜得新詩



句。月照碧窗黃葉灣。

其三

家家種橘住溪灣。籬下黃花屋下山。如此秋光如此月。斯人不可使常閒。

其四

斯人不可使常閒。閒看青帘不看山。底是危橋偏欲渡。酒家遙住桂花灣。

其五

年尾年頭只愛山。斯人不可使常閒。爲儂鈎榻殘碑字。碑在松杉灣更灣。

其六

小船撥過小溪灣。菱葉紛開見遠山。放却漁竿便吹笛。斯人不可使常閒。

題杜少陵集

兔脫如飛神鷲見。珠沉無底老龍知。少年却悔輕吟咏。五十方能讀杜詩。

新燕

趙家姊妹不如他。穿入珠簾疾似梭。輕俊無過新燕



子。小時喫得落花多。

題龍華寺

浦邊分得一袈裟。勅賜龍函出內家。好向東軒開一  
竇。紙窗修竹對梅花。

題香山九老圖

蓮花巾插舞山香。南岳吹笙月似霜。侍女雙成休誤  
曲。曲中能顧有周郎。

初夏

小舟貼岸綠陰齊。爲愛西峰更轉西。茶後香前圖一  
覺。深松細雨呌黃鸝。

休夏山居

六月貪看瀑布涼。兔絲風擲茯苓香。攜筇轉入深巖  
裏。冷對長松坐草堂。

避客

叢竹名花一畝宮。猶嫌閭井認山翁。重巖洞裏松泉  
下。結箇小庵東更東。

登山

緊絆芒鞋未肯休。月明數里到峰頭。不須榔栗過眉



杖我狎山君似海鷗。

鐘樓

雲物晴開萬井塵。滿城花鳥換新春。一聲敲破乾坤夢。喚起茫茫未醒人。

漁舟

有白鷗處不受暑。多綠楊邊好放船。却把功名都打破。一竿風月弄江天。

雨霽

忽得松風枕簟清。前山雨霽石樓明。卷簾不見樓中客。竹裏遙聞落子聲。

出塞行

秋風何處起悲笳。塞草荒荒一片沙。白晷將軍紫駟馬。千鍾虜酒面如花。

梅花二首

酒清花綺雪交加。睡足春宵春夢賒。夜半微風打窗紙。不知是雪是梅花。

其二

月中無際定花光。春氣綢繆別有香。半臂黃衫何處



客一聲長笛滿樓霜。

燕未來

輕寒輕暖軸簾鈎。花月虛無燕子樓。樓上美人慵未起。殘粧冷落玉釵頭。

種松

新髮鬖鬖碧似松。曉叅夜坐候孤鐘。莫教洗鉢石臺下。山後年來有臥龍。

坐友君軒

竹林深處小亭開。獨雀時時啄紫苔。羽扇不搖紗帽側。晚涼青鳥忽飛來。

同玄宰看梅二首

一瓢隨意坐山家。醉後重扶上小車。不是向人驕健骨。春遊只恐負梅花。

其二

先生杖屨故閒閒。每到花時嬾出山。只使下山常送客。不離香雪幾回灣。

客至

小窗前後對山開。樹底幽禽去復回。簾外忽聞人語



響。柳陰誰抱短琴來。

春暮

杏花如雪雨星星。病骨支離一草亭。三月芒鞋猶挂壁。門前山爲阿誰青。

山中

燒却兵符臥草萊。春醪初熟早梅開。深林雪暗多虎跡。荷蓀丈人何處來。

贈友

不到山中三十年。布衣芒屨鬢蒼然。門前丈許籬邊地。曾坐桑陰一聽蟬。

訂友

雙鳩喚雨單鳩晴。笛中柳枝縱復橫。好風忽捲讀書幔。待君到此新笋生。

見楊花

爲憐春去一登臺。非雪非梅不可猜。半百老人頭漸白。莫教吹上鬢邊來。

題花主人家三首

春風無力柳條斜。新草微分一抹沙。欲向主人借鋤



明香堂 卷之六  
鋪。掃開殘雪買梅花。

其二

返棹山中日未斜。釣磯潮退弄平沙。雨餘茆屋秋無恙。一樹桐陰覆菊花。

其三

同僧來訪夕陽斜。綠樹模糊界白沙。風咽蟬聲吹不斷。一窗幽夢紫薇花。

深秋

草綠蘋香穀水紋。秋山寂寂冷斜曛。庭前雙桂窗留影。時宿寒鴉與斷雲。

南都

太平風物是京華。白馬黃衫七寶車。寒食鬪雞歸去晚。院門新月印梨花。

春游

柳葉沉沉蘆笋肥。碧湖青草鷺鷥飛。桃花一樹魚三尺。不醉月明人不歸。

銷夏

幾日不登峰上頭。參差竹樹已沉樓。到來不用尋銷



夏。雀。叫。一。聲。天。欲。秋。

秋夜歸

蓬底寒蛩點客衣。村邊漁火度橋歸。空山何處吹秋  
笛。深夜無風雲自飛。

有懷

村邊楊柳已拖黃。一路雲埋舊講堂。偶向梅花村裏  
度。芒鞋到處雪痕香。

題畫

怕將名姓落人間。買斷春江蘆荻灣。幾度招尋尋不  
得。釣魚船子在深山。

春日山居

花谿柳浪綠參差。一路黃鸝弄舌時。笑我姓名藏未  
穩。白頭田父解求詩。

渡泖

秋老江瀕漾夕空。蕭蕭楓葉挂疎紅。那知三泖清秋  
思。偏寄蘆花一寺中。

看菊

四面羣峰入草堂。尚餘竹木繞迴廊。雖然處士無功



業也種黃花滿地香。

題壁間偈

附

一兔橫身當古路。蒼鷹纔見便生擒。後來獵犬無靈性。空向枯椿何處尋。

靈隱作

竹引峰頭泉外泉。幽栖恰入畫中禪。牕前五箇老松樹。松鼠窺人自在眠。

讀陽城王興傳

耳出頭顱下及肩。嵩山人說地行仙。長食九節菖蒲葉。十五桃花美少年。

和西生乞松詩

栽松莫問路西東。補足前朝十八公。我願化爲長耳佛。來來往往聽松風。

題版築求賢圖

兩番卜相屬英雄。時事違心進泖東。新主詔書求版築。登朝猶是黑頭公。

法相寺祈男得男者。許種松一萬。有損松者。報亦如之。



六橋徧種桃千樹。攀折花枝委道邊。我欲種松三四里。生男箇箇耳垂肩。

和陸劬思二首

儲無擔石任人嘲。數卷殘書續命膠。負米有時曾再出。蓬蒿門外莫論交。

其二

自笑自歌還自嘲。生平不與俗緣膠。草堂種得面竿竹。唯有此君堪定交。

牡丹

天彭牡丹天下奇。王孫買種騎交飛。馬頭籠得名花至。馳入成都露未稀。

壽吳永錫母夫人五十

客皆將相兒應貴。經世文章已大名。莫向君平常問卜。夜聽機杼讀書聲。

眉公先生晚香堂小品卷之六終







